

武英殿聚珍版書

吳興府志卷之五

直齋書錄解題卷二十

宋 陳 振 孫 撰

詩集類下

伍喬集一卷

本江南進士後歸朝

李九齡集一卷

洛陽李九齡撰乾德二年進士第三人

巴東集三卷

丞相萊國忠愍公下邳寇準平仲撰初以將作監丞

知巴東縣自擇其詩百餘首且爲之序今刻於巴東
寇忠愍公集三卷

河陽守范雍得寇公詩二百首爲三卷今刻板道州
草堂集二卷

處士鉅鹿魏野仲先撰

鉅鹿東觀集十卷

野之子閑集其父詩四百篇薛田爲之序野旣沒贈
著作郎故以東觀名集

潘逍遙集一卷

案文獻通考作三卷

四門助教廣陵潘閔逍遙撰

案晁公武讀書志作大名人

嘗賜及

第後坐追奪或云坐盧多遜黨名捕變姓名僧服入中條山卒於泗州又有嚴陵刻本同但少卷末三首

東里楊聘君集一卷

處士鄭圃楊朴契元撰太宗嘗召對拜郎中不受以其子爲長水尉

滕工部集一卷

滕白撰篇首寄陳搏知爲國初人又有右省懷山中及臺中寄朱從事詩則其敷歷清要亦多矣史傳亡

所見未有考也後見實錄載嘗以戶部判官爲南面
軍前轉運使坐軍儲損折免官

王岳集一卷

王岳撰集中有春日感懷上滕白郎中蓋亦國初人
又有聖駕親征河東及有甲午避寇全家欲下荆南
之語則是李順亂蜀之歲岳蓋蜀人也耶

漁舟集五卷

案文獻通
攷作一卷

處士成都郭震希聲撰自稱汾陽山人李旼爲作集
序淳化四年忽作詩曰朝出東門遊東門好春色青

青原上草莫放征馬食詣闕獻書言蜀利病未幾順賊已作矣

王初歌詩集一卷

王初撰未詳何人有延平天慶觀詩當是祥符後人也

書臺集三卷

處士南隆朱有大有撰自稱雲臺山人天禧中王晦叔守蜀以古風六十言遺之書臺者其所居坊名也

甘棠集一卷

知制誥上蔡孫僅鄰幾撰咸平元年進士第一人後其兄何一榜嘗從何通判陝府以所賦詩集而序之首篇曰甘棠思循吏故以名集僅兄弟皆不壽故不大顯

錢希白歌詩二卷

翰林學士吳越錢易希白撰廢王侬之子咸平二年進士第二人景德二年制科初錢氏歸國羣從皆補官獨易與兄昆不見錄遂刻志讀書皆第進士昆至諫議大夫易子彥遠明逸又皆以賢良方正入等宋

興父子兄弟制舉登科者惟錢氏一門易有集百五十卷未見家止有此及滑稽集四卷而已

和靖集三卷西湖紀逸一卷

案宋史藝文志和靖詩集七卷又詩二卷

處士錢塘林逋君復撰梅聖俞爲之序紀逸者近時桑世昌澤卿所輯遺文逸事也

清風集一卷

職方員外郎鮑當撰

石曼卿歌詩集一卷

祕閣校理宋城石延年曼卿撰自爲序石介復爲作

序其仕以三舉進士爲三班奉職出處詳見歐陽公所作墓志

呂文靖集五卷

丞相許國文靖公壽春呂夷簡坦夫撰文靖不以文鳴而其詩清潤和雅未易及也

藥名詩一卷

司封郎中維揚陳亞之撰咸平五年進士有集三卷藥名詩特其一體爾如馬嘶曾到寺犬吠乍行村吏辭如賀日民送似迎時皆佳句不在此集也

金陵覽古詩三卷

虞部員外郎楊備撰億之弟也

李問集一卷

國子博士廣陵李問舜俞撰

晁君成集十卷別集一卷

新城令晁端友君成撰東坡爲作序補之其子也

擊壤集二十卷

處士共城邵雍堯夫撰自爲之序始自共城徙河南

卒於熙寧十年諡康節

臨川詩選一卷

汪藻彥章得半山別集皆罷相後山居時老筆過江
失之遂於臨川集錄出又言有表啓十餘篇不存一

字

注荆公集五十卷

案文獻通攷
作十五卷

參政睂山李壁季章撰謫居臨川時所爲也助之者
曾極景建魏鶴山爲作序

注東坡集四十二卷年譜目錄各一卷

司諫吳興施元之德初與吳郡顧景蕃共爲之元之

子宿從而推廣且爲年譜以傳於世陸放翁爲作序頗言注之難蓋其一時事實既非親見又無故老傳聞有不能盡知者噫豈獨坡詩也哉注杜詩者非不多往往穿鑿傳會皆臆決之過也沈括先與坡同在館閣後察訪兩浙至杭求坡近詩籤貼以爲訕懟李定等論詩置獄實本於括云

山谷集三十卷外集十一卷別集二卷

案宋史藝文志外集作十四卷

黃庭堅魯直撰江西所刻詩派卽豫章前後集中詩也別集者慶元中莆田黃汝嘉增刻

山谷編年詩集三十卷年譜二卷

山谷詩文其甥洪氏兄弟所編斷自進德堂以後今
外集所載數卷有晚年刪去者故任子淵所注亦惟
取前集而已監丞黃螢子耕者其諸孫也既會粹別
集復盡取其平生詩以歲月次第編錄且爲之譜今
刊板粘蒼青城史容儀甫近注外集外集者謂山谷
曾欲以前後倣莊子爲內外也

後山集六卷外集五卷

陳師道無已撰亦於正集中錄出入詩派江西宗派

之說出於呂本中居仁前輩固有議其不然者矣後
山雖曰見豫章之詩盡棄其學而學焉然其造詣平
澹真趣自然實豫章之所缺也

注黃山谷詩二十卷注後山詩六卷

案原本脫注後山詩六卷與解題中

二集皆取前集二語不
符今據文獻通攷補入

新津任淵子淵注鄱陽許尹爲序大抵不獨注事而
兼注意用功爲深二集皆取前集陳詩以魏衍集記
冠焉

盧載雜歌詩一卷

盧載厚元撰集中有與胡則錢惟演往來詩

琴軒集一卷

題南榮浪翁李有慶撰與石昌言任師中同時卷末贈荅十二絕闕其六其曰癸巳歲者殆皇祐中耶

元章簡玉堂集十卷

參政元絳厚之撰

劉景文集一卷

左藏庫使知隰州劉季孫景文撰環慶死事將平之子也東坡嘗薦之坡在杭季孫寄詩有四海其知霜

鬢滿重陽曾插菊花無之句其詩慷慨有氣如其爲人

廣諷味集五卷

吏部侍郎南京王欽臣仲至撰

海門集八卷

渤海張重撰有上蘇子瞻內翰詩又有與張伯玉遊鑑湖晚歸詩伯玉知越州當嘉祐末而東坡爲翰苑在元祐閒重皆與同時特未詳其人

王岐公宮詞一卷